

PEU YA GAGO E TLA HULA

KGORO YA LENABA LA GAGWE

 ...?...selo seo ka mehla ke ratago se ntiragalela ke ge nka kgona go tla ntlong ya Morena. Nka lapa kudu, le go kgathala, le go nyama, le, eupša e re ke no ya ntlong ya Morena moo bakgethwa bohle ba kgobokanego le go rapela, gona ke ya go ikwela bokaonana ka pelapela. Go na le se sengwe se thobago ka yona. A ga le nagane bjalo, baena? Se sengwe seo se nogo go thoba le go bonala se šidulla mašošo ohle, gomme o no kgotsofala. [Ga go selo go theipi—Mor.]

² ...dipoelo tša mafelelo...[Ga go selo go theipi—Mor.]... tirelo bakeng sa bošego bja mathomo, le go rapela gore Modimo kgafetšakgafetša, Ngwanešu Wagner, go no tšwelapele go re fa yona mehuta ya ditirelo.

³ Bjale, ga re tsoge ra tseba bošego ka bošego se Moya wo Mokgethwa o yago go se dira ka rena. Re no tla mo ntle le sebopego, ntle le tirelo e ka ba efe, re no letela Morena le go bona se A tla re hlahlelago go se dira. Gomme ke nagana yeo ke tsela ye re swanetšego go dira: Etlang gomme le lete go Morena.

⁴ Bjo bongwe bja mašego a ke nyaka yo mongwe wa baopedi ba bakaone ba tikologong fa go nkopelela yeo, “Bao ba letelago Morena ba tla mpshafatša maatla a bona.” Oo, ke no rata yeo. Ka gore seo ke se ke ilego ka swanela go se dira bophelong bjohle bja ka, ke thabile kudu ke ile ka swanela go se dira. Ke leta letšatši le lengwe le le lengwe le iri ye nngwe le ye nngwe feela se A tla se dirago. Ga ke ne mabokgoni a ka mong, ga go—ga go thuto go ithekga ka yona, ke no swanela go ithekga ka Yena. Gomme iri ka iri ke no Mo letela, go bona se A tla mpotšago go se dira.

⁵ Le se leke go gakanega ge makgolo a dipitšo le balwetši le go hwa. Ge o gakanega gohle, gona Modimo a ka se kgone go go šomiša, e no dula tuu, Ke yo mogolo go lekanela go go botša. Gomme kafao, e no tšwelapele o bolela le Yena, gomme O tla go botša o dire eng ge o fihla kua. Go kaonekaone go no phethagatša thomo ya rena, morago re Mo lese a re botše se re ka se dirago morago ga ge re fihlile fale. A ga le nagane bjalo? Go kaone kudu.

⁶ Ke be ke thabile kudu go kwa seo, gomme ke a holofela ke na le se gabotse, gore dikereke tšohle di tla mmogo bakeng sa go tšwetšapele tirišano bakeng sa Lamorena, ba na le yona ka Lamorena morago ga sekgaalela gore e se tsenatsene e ka ba efe ya dikereke le ditirelo tša bona. Morena a le šegofatše, baena, seo se kaone ka maatla le go botega. Ke leboga seo, go dumelela batho...le go kgobela yo mongwe le yo mongwe mmogo. Seo ke

se re lego mo go se dira, ke go dirišana mmogo ka go se sengwe le se sengwe, go kopanya dimpho tšohle tša rena le maatla, le go ya pele, go ya ka Mmušong wa Modimo. Yeo ke tsela e nnoši re ka tsogego ra sepediša morwalo wo mogolo wo, ke go goga mmogo.

⁷ Ke be ke tlwaetše go otlela dipere kudu. O hwetša morwalo wo boima gomme o tšea pere e tee, o tla goga, gomme morago wa e tlemolla, ye nngwe e a goga, gomme o no se kgone go fihla felo. Eupša a nke di homole, di bee magetla a tšona mmogo, gomme morago di thome. Gomme ye nngwe ya tsela ye kaonekaone go dira seo, go dira morwalo go gogega ka mokgwa woo, ke go etapele dipere tša gago. Gomme yeo ke tsela ye kaonekaone re e hlokago bjale ke go ema, go tlogela go thuhlula, go taboga, gomme re dumelele Moya wo Mokgethwa go re etapele, yeo e no ba tsela, go e etapele thwi go ya ntle, gomme morwalo o tla rwalwa, ke ne kgonthe.

⁸ Bjale, feela pele re bula Lentšu, ka gore re nyaka le tsoge ka leselaphutiana mosong gomme le tsenela sekolo sa lena sa Lamorena. Gomme bjale, lena baeng fa, bao le lego basetsebjale ka toropongkgolo, banna ba fa bohle ba emela dikereke, go tla ba ye nngwe ya tšona kgauswi le moo o dulago, o tsenele ye nngwe ya tšona gosasa mosong gomme gape gosasa bošego, tsenelang tše dingwe tša dikereke tše, le tla amogelwa go e ka ba efe ya tšona.

⁹ Gomme lena maloko fa a kereke, dihlopha tša go fapana, memelang batho ba gae le lena go tsenela kereke, ba botšeng moo kereke ya lena e lego gona. Ge nkabe ke dula ka San Jose, ke be ke tla ba wa ye nngwe ya dikereke tše, yeo ke nnete tlwa, ke be ke tla ba le bana ba ka ka dikolong tša bona tša Lamorena, gobane dikereke tše di emela sona selo sa go swana seo ke neelago bophelo bja ka bakeng sa sona, Ebangedi ye, Ebangedi ya go tlala. Gomme ka kgonthe ke be ke tla ba le bana ba ka go rutwa ka dikolong boka tšela, tšeo di bego di tla ba ruta Lentšu la Modimo le tsela ya Bophelo. Gomme ke na le nnete ba tla le dira gabotse ge le ka no tsenela ditirelo tša bona gosasa mosong. Gosasa morago ga sekgalela ebang fa, gomme gosasa bošego, eyang morago go ye nngwe ya dikereke. Tšohle di tla . . . tšohle di tla thabelwa. Ka gona beke ye e latelago re thoma thwi ka gare ka tsošetšo ya rena ye e tšwelago pele bošego bjo bongwe le bjo bongwe beke ye e latelago.

¹⁰ Bjale, pele re bula Lentšu, a re boleleng le Mongwadi.

¹¹ Yo mongwe o rile go nna nako ye nngwe, o rile, “Ngwanešu Branham,” o rile, “ka kgonthe o ne Seisimane se sebe.”

Gomme ke rile, “Ke tseba seo.”

¹² Gomme o rile. . . Yo e be e le monna wa setswerere kudu, gomme go nyakile bohle ba lena le a mo tseba, a ka kgona go rera ka maleme a šupago goba a seswai, gomme kafao o rile go nna, o rile, “O no se tsebe Beibele ya gago,” a ahlaahla se sengwe le nna.

¹³ Gomme ke rile, “Eupša ke tseba Mongwadi gabotse ka kgonthe.” Gomme seo—seo ke kgwekgwe ya selo. Ke... Ge feela ke Mo tseba, O tla ntlahlela ka go se se lokilego, ke dumela seo. Kafao a re boleleng le Yena bjale ka dihlogo tša rena di inamišitšwe, feela nakwana.

¹⁴ Mothomi yo Mogolo wa Bophelo, Mongwadi wa Mangwalo a makgethwa ao re a filwego, a šušumeditšwego ke Moya wo Mokgethwa, gomme a ka kgonago feela go hlathollwa ke Moya wo Mokgethwa, gomme ke a rapela gore O tla Mo romela bošegong bjo, Mohlatholli yo Mokgethwa wa Lengwalo le le go Le bea ka dipelong tša rena, yo mongwe le yo mongwe wa rena, gore re kgone go amogela tumelo bakeng sa se sengwe le se sengwe re se hlokago bošegong bjo.

¹⁵ Ge go na le bao mo ba sa Go tsebego bjalo ka Mophološi, a nke Lengwalo le neelwe go pelo ya bona bošegong bjo ka Moya wo Mokgethwa, gore Kriste o hwetše dibe tša bona go ya ka Mangwalo. Gomme efa, ge ba se ba amogela Moya wo Mokgethwa le bjale, a nke bjo e be bošego, gore ge karolo ye ya Lengwalo e tla fiwa bona, gomme a nke ba amogele Moya wo Mokgethwa wa go šegofala go šoma thato ya Modimo ka maphelong a bona.

¹⁶ Gomme re tla rapela, Morena, bakeng sa bao ba babjago le go hloka bošegong bjo, batswalelelwa ka gare, le bao ba lego ka sepetlele, godimo ga mepete ya lehu, O Modimo yo mogolo wa Legodimo, romela Barongwa lehlakoreng la mpete wa bona gomme ba fodiše mebele ya bona ya go babja, Morena. Bolela khutšo ya Modimo le bona.

¹⁷ Gomme bao ba lego gona, a nke Lengwalo le neelwe go bona ke Moya wo Mokgethwa bošegong bjo, gore ba ke ba tsebe Lengwalo le re, “Ke nna Morena yo a fodišago malwetši a lena ohle.” Gomme a nke go se be modiradibe goba motho wa go babja magareng ga rena ge tirelo e tswalelwa bošegong bjo. A nke dipelo tša bakgethwa di phagamišetšwe godimo ka go ditumišo tše kgolo le thabo, go fihla go tla ba *haleluya* gohlelele mo—mo moagong ka moka. Gomme ntle mabaleng, ge ba tloga, a nke ba bolele boka bale ba tšwago Emause, “A dipelo tša rena ga se tša swa ka gare ga rena, ge A be a bolela le rena mmogo tirelong?” E fe, Morena.

¹⁸ Gosasa, efa yo mongwe le yo mongwe wa badiredi ba, Morena, ke a rapela gore O tla ba fa tlotšo ye bjalo gosasa, go fihla kereke ye nngwe le ye nngwe e tla ba le mollo wa tsošetšo ka go yona. A nke badiradibe ba phološwe, gomme badumedi ba tlatšwe ka Moya, gomme balwetši le batlaišwa ba fodišwe ka dikerekeng. A nke go be go tla go tšwa gohlelele nageng gosasa bošego, go paka ka dilo tše kgolo tše di diregilego ka dikerekeng tša bona. E fe, Morena. Re fe diphenyo tše, Tate.

19 Bjale hlwekiša modumedi yo mongwe le yo mongwe, re fihle ka morago ga Lentšu, Morena, a nke Madi a boelanye bakeng sa dibe tša rena. Gomme a nke Moya wo Mokgethwa o no tsena gomme o tšee tokelo ya tsela ka maphelong a rena go tšwa go yona palo ya Lentšu, go fihla go tswaleleng ga tirelo. Ka gore re a e kgopela, ka Leina la Jesu, le bakeng sa Gagwe. Amene.

20 Re nyaka go bala tše dingwe go tšwa go Dingwalwa tše kgethwa bošegong bjo ka mafelong a mabedi a go fapana ao ke a hlaotšego go bala go tšwa go wona. Gomme ke nyaka go tšea thuto thwi ka morago ga go bala Lentšu. La pele, re be re eya go bala go tšwa go Genesi tema ya 24 go thoma ka temana ya 56 le go bala go theoga go akaretša ya 60. Gomme ka gona re nyaka go thoma ka go Genesi 22 go temana ya 15 le go bala go akaretša ya 18. Bjale ka go Genesi 24:56 e balega bjalo:

Gomme o rile go bona, Le se ke la ntšhitiša, go boneng MORENA o atlile tsela ya ka; ntokolleng gore ke ye go mong wa ka.

Gomme ba rile, Re tla bitša mothepana, le go nyakišiša molomo wa gagwe.

Gomme ba biditše Rebeka, gomme ba rile go yena, A o ka ya le monna yo? Gomme o rile, ke tla ya.

Gomme ba rometše . . . Rebeka kgaetšedi wa bona, le mofepi wa gagwe, le mohlanka wa Abraham, le banna ba gagwe.

Gomme ba šegofaditše Rebeka, gomme ba re go yena, Wena o kgaetšedi wa rena, eba mmago dimilione tše dikete, gomme a nke peu ya gago e hule kgoro ya bao ba go hloilego.

21 Gomme ka go Genesi 22:15:

Gomme morongwa wa MORENA o biditše Abraham go tšwa legodimong lekga la bobedi,

Gomme o rile, Ke enne Ka nnamong, o rialo MORENA, gobane o dirile selo se, gomme wa se gane ka morwa wa gago, morwa wa gago a nnoši:

Gore go šegofatšeng Ke tla go šegofatša, gomme go atišeng Ke tla atiša peu ya gago bjalo ka dinaledi tša legodimo, le bjalo ka lešabašaba . . . godimo ga leši la lewatle; gomme peu ya gago e tla hula kgoro ya manaba a gagwe;

Gomme ditšhaba tšohle tša lefase di tla šegofatšwa ka peu ya gago; gobane o obametše segalontšu sa ka.

22 Ge nka e bitša thuto feela dinakwana di se kae, ke tla bolela se: *Peu Ya Gago E Tla Hula Kgoro Ya Lenaba La Gagwe.*

23 Modimo o be a leka Abraham go bona ge eba o be a tla swara tshepišo ya gagwe go tliša ka pelo ye e bego e na le tumelo ya go

se otswafatšwe. Le a tseba, go na le batho ba bantši kudu ba ka kgonago go swara Lentšu motsotso feela, Le bonala le le botse ka kgonthe go bona, gomme ka gona ka morago ga diiri di se kae se sengwe se tla mmogo kgahlanong le se Peu e bonalago e ba botša, gomme mafelelong Le tla pona. Ba bangwe ba kgona go Le boloka matšatši a se makae, eupša ba bangwe ba bonala ba Le swara go fihla ba ka se tsoge ba Le tlogela. Jesu o boletše ka tše nakong ya Gagwe, ka fao Peu e wetšego godimo ga mobu wa lekgwara, le godimo ga meetlwa le ditshehlo, gomme ka gona tše dingwe ka mobung wo mobotse.

²⁴ Bjale, la mafelelo mo ke tšere manthapama a mararo a molokoloko ka ga thuto ya Abraham, ka fao Modimo a mo filego tshepišo ge a be a le bogolo bja mengwaga ye masomešupa tlhano, gomme a mmotša gore o be a swanetše go ba le ngwana ka Sarah mogatšagwe, masometshela tlhano ka nako yeo. Gomme Abraham o dumetše se Modimo a se boletšego e be e le therešo, ga se a ke a šetša ka fao a bego a tšofetše, goba ka fao Sarah a bego a tšofetše.

²⁵ Peu e swanetše go be e tsemile medu go teba ka kgonthe ka soulong ya Abraham, ka gore go tšere mengwaga ye masomepedi tlhano bakeng sa Peu yela go tsoge ya tšea bophelo. Eupša Abraham ga se a ke a E fediša ka baka la gore ga se a ke a E bona e gola, gomme e bonagala eka e thoma go fapana le kholofedišo nako yohle, eupša Abraham o tsebile gore E be e le Lentšu la Modimo gomme Modimo o be a tla boloka Lentšu la Gagwe. Bjale, nako e tllile ge Abraham a be a le thwi go bogolo bja mengwaga ye lekgolo pele Peu e ka tsoge ya thoma go tšea bophelo.

²⁶ Gomme Modimo, go lekeng Abraham, ka tsela ye A dirilego Abraham O dira Peu ya Abraham. Gomme re swanetše go lemoga gore rena, badumedi, re Peu ya Abraham, ka gore Beibele e boletše gore ge re hwile ka go Kriste, re Peu ya Abraham le bajabohwa le yena, go ya ka tshepišo. Gomme re amogela Peu ya Abraham ge re amogela Moya wo Mokgethwa, re amogela tumelo le Moya wo Mokgethwa wo yeo e bilego tumelo yeo e filwego tate Abraham, ka gore ge re ehwa ka go Kriste, re tšea tshepišo.

²⁷ Abraham, monna yo mogolo wa tumelo, re a mmitša, le ka fao gore Modimo o tlišeditše ditshepišo tšohle tša Gagwe go Abraham, gomme a tshepiša gore ka matšatšing a mafelelo ka fao A tla tlišetšago selo sa go swana seo A se boletšego go Abraham, O tla se tlišetša gape ka Peu ya Abraham.

²⁸ Jesu o e topile ka go Testamente ye Mpsha gomme a bolela morago ka se Abraham a se dirilego, gomme a bolela pele go moloko wo. Ka gore re a lemoga feela pele ga tshenyo ye kgolo ya Sodoma, Jesu o boletše ka yona ka matšatšing a Gagwe gomme o rile, “Bjalo ka ge go bile ka matšatšing a Sodoma, go tla ba bjalo

ka go tleng ga Morwa wa motho.” Feela ditiragalo tša go swana, go tla ba bjalo go Peu ya Abraham mo matšatšing a mafelelo.

²⁹ Bjale, re a tseba gore toropokgolo, Sodoma, e be e arogantšwe ka badumedi le basedumele. Gomme basedumele ba be ba le ba babe, ba hloka maitshwaro kudu, bjalo ka ge basedumele ba lehono ba le; gomme kereke ye e bego e le ka Sodoma e be e le seemong se bolelo, feela bjalo ka ge kereke lefaseng lehono e le; eupša go be go le sehlopha, peu ya Abraham, seo se bego se bitšwa Bakgethiwa, bao ba ikarogantšego bonabeng go tloga go lefase ka moka, yeo e bile peu ya Abraham.

³⁰ Gomme ge nako ya ketelo e etla pele ga phedišomoka ya Mollo wo mogolo wo o wago go tšwa Legodimong gomme o tšhuma toropokgolo yohle, e bego e le sekai sa letšatši le leo re phelago moo tshenyo ya lefase e tla tlogo ka Mollo, hlokomelang, feela pele seo se direga go bile batseta ba bararo ba tšwago Legodimong. Gomme ba tlile pele go Abraham, Kereke mokgethiwa, gomme ba dula fase, le go bolela le yena. Gomme ba babedi ba bona ba emeletše gomme ba thoma go theogela Sodoma go ntšetša kereke ye fomale ntle, kereke ya kerekeleina, sebopego, kereke ya selomodiro, eupša yo Motee o šetše morago go bolela le Kereke ye e kgethilwego, peu ya Abraham.

³¹ Gomme bao ba ile tlase le go bolela le Sodoma, le Loto, le go bana ba gagwe, le go ditlogolo tša gagwe, le bagonyana ba gagwe, le go ya pele, ba rerile Ebangedi ya kahlolo ye e tlogo. Seo ga se sekai sa go phethagala sa Billy Graham wa sebjalebja, ga ke e tsebe. Gomme a le hlokometše, e fofaditše mahlo a batho? Gomme thero ya Ebangedi, ge e se ya amogelwa, e fofatša mosedumele.

³² Eupša go bile Yena re nyakago go mo hlokomela bošegong bjo, E bile Yena yo a šetšego morago gomme a bolela le Abraham. O rile O be a le Mosetsebje gomme O sepetše kgole. Gomme O rile go Abraham, “Abraham, mogatšago o kae, Sarah?” Ge A be a le Mosetsebje gomme a sa tsebe Abraham, O tsebile bjang gore o bile le mogatša gomme leina la gagwe e be e le Sarah?

³³ Bjale, Peu ya Abraham, phafogang! Morongwa yo o tsebile bjang, Monna yo, o tsebile bjang gore Abraham o nyetše gomme leina la mogatšagwe e be e le Sarah? O rile, “Sarah o kae, mogatšago?”

Abraham o rile, “Ka tenteng,” e bego e le ka morago ga Morongwa, goba Monna yo a bego a bolela.

³⁴ Gomme O rile, “Go boneng gore Abraham ke mojabohwa wa lefase, Nka se ute sephiri se go yena, eupša go ya ka nako ya bophelo Ke ya go go etela, gobane o bolokile tshepišo ya Modimo. Gomme Sarah o ya go belega lesea lela leo Ke go tshepišitšego mengwaga ye masomepedi tlhano ya go feta.” Ke ka fao Peu ya Abraham e bolokago tshepišo, ba swarelela go Lentšu la Modimo. “Mengwaga ye masomepedi tlhano ya go feta Modimo

o dirile tshepišo go wena, Abraham, gomme o bile go botege go yona, gomme o bogolo bja mengwaga ye lekgolo bjale. Bjale Ke ya go netefatša maatla a Ka go wena, gore Peu ka morago gago e tla tseba go swara Lentšu la Modimo le go swarelela go Lona.” Ga go kgathale e leta botelelele gakaakang, efela O tla araba, swara Lentšu la Modimo gomme o se Le lese la tloga.

³⁵ Ka gona, ge Sarah a kwele se ka morago ga Morongwa, a dutše ka tenteng, o segile ka gare ga gagwe mong. Gomme Morongwa, a lebeleletše Abraham, ka mokokotlo wa Gagwe go tente, o rile, “Gobaneng Sarah a segile?” A ga le bone Modimo, Moya wo Mokgethwa wola wa go swana o bego o le go Yena yola o tllile ka magareng ga Kereke mo matšatšing a mafelelo? “Gobaneng Sarah a segile?”

Sarah o be a tšhogile, gomme o rile, “Ga se ka dira.”

O rile, “Oo, ee, o dirile.” Ka gore o be a boifa.

³⁶ A le bona se Jesu a se boletšego? Go tla ba le maswao ka matšatšing a a mafelelo, gomme, “Bjalo ka ge go bile ka matšatšing a Sodoma, go tla ba bjalo ka go tlang ga Morwa wa motho.” Bjale, Peu ya Abraham, phafogang, swarelelang, šetšang Modimo a boloka Lentšu le lengwe le le lengwe, le ge e bile mengwaga ye dikete tše pedi ya go feta, Modimo o phethagaditše tshepišo ya Gagwe, se Jesu a rilego se be se tla direga. Go na le Sodoma ya sebjalebja, go na le baebangedi go kgabola naga, go na le kereke ye fomale, go na le Kereke ya semoya. Šetšang moo dimpho tšela di šomago le ke dihlopha dife di šomago ka go tšona. Modimo o boloka Lentšu la Gagwe.

³⁷ Ge moisa yo monnyane a belegwe, Modimo o file Abraham moleko wa go menagana go netefatša gore Peu ya Abraham e a botege. O mmoditše go neela morwa wa gagwe, le tseba kanegelo. Ge a ile go mmolaya go be go le kgapa e lla ka lešokeng ka morago ga gagwe, gomme o neetše kgapa. Gomme e be e le kgapa, e be e se pono, madi a tšwile go yona, madi ga a tšwe go pono. O bolaila kgapa, ka gore kgapa e boletše ka go tla ga Kriste.

³⁸ Ka gona ge Modimo a bone gore O bile le monna yo A kgonneggo go bea tshepo ka go yena, O rile, “Ke enne ka Nnamong.” Ka gore motho ka mehla o ena ka yo mongwe yo mogolwane go mo feta, gomme ga go yo a bego a le yo mogolwane go feta Modimo, kafao O enne ka Yenamong gore Peu ya Abraham e be e tla hula kgoro ya lenaba. Oo, nna! O e enne. Modimo, ka Yenamong, o enne gore Peu ya Abraham e be e tla hula kgoro ya lenaba.

³⁹ Šetšang ka fao A e netefaditšego: Rebeka, a eya go ba karolo ya Isaka, e lego karolo ya peu gape ka mosadi, gomme ge tatagwe, le bana babo, le mmagwe, le baratwa ba gagwe, leloko, ba dumela go Modimo, ge ba . . . o dirile, o beilwe tshekong. Gomme ge go etla tshekong, “A o tla ya le mosetsebye yo, goba a o tla dula le rena?” sephetho sa gagwe se dirilwe ka pela, go hlaka. Yeo ke

tsela ye batho ba Modimo ba se dirago, ka lebelo le ka pela. “Ke tla ya,” o boletše. A sa tsebe mo a bego a eya, eupša ka tumelo o ile, ka gore go be go le se sengwe ka gare ga gagwe se thomilego go sepela, gomme o tsebile gore Modimo o be a le ka go sona.

⁴⁰ Gomme ge ba mmeile godimo ga kamela, ba mo šegofaditše gomme ba re, “A peu ya gago e be dimilione tše dikete.” Dimilione tše dikete! Modimo o boditše Abraham, “Boka dinaledi tša legodimo, goba lešabašaba lešing la lewatle.” Seo ke go tliša Bantle ka gare. Yeo ke tsela ye peu ya Abraham e tla bago.

⁴¹ Gomme gape ba rile, “A peu ya gago e hule kgoro ya lenaba la yona.” Modimo a tshepiša ka yena, ka Abraham, gore peu e tla hula kgoro, gomme e tla dira. Ge feela go na le Peu ye e šetšego ya Abraham, E tla hula kgoro ka tshepišo ya Modimo boka Abraham a dirile, E tla dira seo.

⁴² Ge Israele e be e le matšheng wa yona gomme ya tla nageng ya Moaba, go be go le kgoro, gomme ba re, “Re ka se le dumelele go feta go kgabola.” Gomme ba tlišitše moprofeta wa bona go rogaka batho; sebakeng sa thogako, o šegofaditše. Ba lekile go mo laetša dilo tšohle tše mpe tšeo batho ba ba di dirilego, eupša Modimo o mmontšhitše dilo tše botse ka yona. Ka gore o bone Leswika lela le iteilwego le sephente yela ya mphiri e eya pele, e ba direla poelano, gomme sebakeng sa go rogaka, o šegofaditše peu gomme ba hutše naga gobane ba be ba le tseleng ya bona, ba boloka tshepišo ya Jehofa. Ga se gona se kgonneggo go ba thibela, gobane ba be ba le peu ya Abraham ka tshepišo gore ba be ba tla hula kgoro ya lenaba le lengwe le le lengwe, gomme ba e tšere.

⁴³ Daniele, peu ya Abraham, o lahletšwe ka leubeng la mollo, goba legolong la ditau, ntshwareleng, Daniele o lahletšwe ka legolong la ditau go bolawa ke tau, gomme Morongwa wa Morena o tlile bošegong bjoo gomme a emiša tau. Ga go pelaelo e be e le Pilara yela ye kgolo ya Mollo yeo e latetšego bana ba Israele. Phoofolo e boifa seetša. Gomme ge Seetša se segolo sela se eme fale, tau e robetše fase, gomme Daniele o hutše kgoro ya lenaba la gagwe, o tswaletše molomo wa tau, gobane o bile le tshepišo ya Modimo gomme o be a le peu ya Abraham.

⁴⁴ Bana ba Bahebere, ge ba lahletšwe ka leubeng la mollo, ba hutše dikgoro tša leuba. Gomme Morwa wa Modimo o tlile fase gomme a tšea mollo go tšwa go bona, gomme ba hutše dikgoro tša lenaba la bona.

⁴⁵ Eliya ge, gape o be a le peu ya Abraham, ge setšhaba ka moka se mo hlanogetše, kgoši, kgošigadi, le yo mongwe le yo mongwe, efela o eme fale godimo ga Thaba ya Karamele, godimo ga tshepišo ya Modimo, gomme o hutše dikgoro, dikgoro tša ditšhabatšhaba tša naga yeo. O dirile ka gobane o be a le peu ya Abraham ka tshepišo ya Modimo.

⁴⁶ Ge Moshe, peu ya Abraham, a ile godimo ka thomo ya Modimo, a boloka Lentšu la Modimo, o ile tlase ka Egepete, a tliša batho pele go ba iša nageng ya tshepišo, diabololo o gogile kgoro go ba phekaganya. O be a le fale, a dikologilwe ke madira a Farao, a kgakgetšwe ka Lewatleng le Lehubedu, eupša Modimo o dirile phefo ye maatla go thoma go foka, gomme ba hutše kgoro ya lenaba, gobane O butšweditše mothalo wa go oma go kgabaganya le—le lewatle. Gomme ba ile pele go leba tshepišong, ba sepela godimo ga naga ya go oma gobane ba be ba le peu ya Abraham ka tshepišo ye e ennwego, “Ba tla hula kgoro ya lenaba.”

⁴⁷ Ge ba tlile go tšwa lešokeng go ya ka Jorodane, ge Modimo a boletše le Joshua wa go tuma, le go botša Joshua go tshelela mošola, go dira batho komana, e be e le kgwedding ya Aporele, kgwedi ya mafula. Meedi ka moka ya Jorodane e be e phatlaletše go kgabaganya. Go be go lebega o ka re e be e le leano la go šokiša la Modimo go ba tliša lefelong lela, go Jorodane yela ya kgale ya leraga, nako ye mpempe ka lefaseng, ge noka e le godimodimo.

⁴⁸ Ka mehla, Modimo o go dumelela go fihla bofelong bja mafelelo bja tsela, maele wa mafelelo wa tsela, morago O gatela ka gare. Ge o le Peu ya Abraham, dumela Modimo gomme o sware tshepišo ya Gagwe bakeng sa phodišo, bakeng sa phološo, bakeng sa kolobetšo ya Moya wo Mokgethwa, e ka ba eng e lego, e ka ba eng lenaba le lego, Modimo nako ye nngwe o go dumelela go fihla thwi go ya bofelong bja tsela, gomme go lebega gampe go feta go kile gwa dira, ngaka o rile, “Ga go sebaka.” Eupša o Peu ya Abraham, ka tshepišo gore o tla hula kgoro ya lenaba le lengwe le le lengwe.

⁴⁹ Joshua ga se a ke a nagana gore Jorodane e be e le bophara gakaakang goba e be e le leraga gakaakang, o rile, “Kgobokanang lenabeng mmogo, gomme le itlhwekiše lenamong, gomme le tšee areka ya Modimo gomme le ye pele.” Gomme o hutše kgoro ya lenaba. Gobaneng? Gobane o be a tšeela batho ba tshepišo go ya go naga ya tshepišo ka tshepišo ya Modimo gomme ba be ba le bana ba Abraham. Seo se dira Mobaptist a ikwele boka go goelela. Peu ya Abraham e tla hula kgoro ya lenaba.

⁵⁰ Ee, o tsholetše mošola wa Jorodane. Re swanetše go tla Jorodane, le rena, nako ye nngwe. Bahlabani bohle ba bagolo ba ba ile ba swanela go hwa gobane ba tswetšwe ka sebeng, ba tswetšwe ka kganyogo ya thobalano, ba kgolokelwa bokgopong, ba tla lefaseng ba bolela maaka, eupša go beng tshepišo, go beng peu ya Abraham ka tshepišo yeo Modimo a e filego Abraham, ba kokobeditše mebušo, gomme ba dira toko, gomme ba emiša molomo wa ditau, gomme ba phonyokgile ntlha ya tšhoša, ba šuthišeditše meetse morago, le go tsoša bahu, ka gore ba be ba le peu ya Abraham ka tshepišo ka Modimo Yenamong, se A bego a tla ba direla.

⁵¹ Ka gona mafelelong letšatši le lengwe gwa tla Peu ya Bogoši, e sego ya tswalwa ke monna, eupša e inngwego ka popelong ya kgarebe ka Modimo Yenamong ntle le tlhologelo ya thobalano, e tswetšwego ke Moya wo Mokgethwa. Ge Moya wo Mokgethwa o ukametše kgarebe ye nyane ka moriti gomme a ima ka kua Peu ya therešo ya Abraham, tumelo ye Abraham a bilego le yona ka go Modimo, Modimo o be a dirile tshepišo ya Peu ye, e tswetšwego tswalo ya kgarebe, gona O bile le maatla godimo ga dikgoro *tšohle* tša lenaba. Ge A be a le lefaseng, O bile le dikgoro tša bolwetši ka maatleng a Gagwe Mong. O boletše le balwetši, gomme dikgoro di bulegile, gomme ba sepeletše ntle ba lokologile. O be a swere di—di dikgonyo tša kgoro ya lephera, ya digole, ya ditlaišego, ya meleko.

⁵² Ba Mo phasotše mo sefahlegong, le go dira se sengwe le se sengwe ka go goga maledu go tšwa sefahlegong sa Gagwe, gomme ba tshwela godimo ga Gagwe, gomme ba leka go Mo dira a dire se sengwe se se bego se fošagetše. O rile, “Nka kgona go bolela le Tate wa Ka, gomme ka pelapela O be a tla Nthomela dikgao tša madira tša Barongwa tše lesome.” O be a ka kgona go e dira, eupša, O be a na le maatla. Gobaneng? O be a swanetše go latswa lehu. Bahlabani bohle ba bangwe ba ba dirile diphenyo, le go ya pele, eupša O ile a swanela go fenywa yena yola yo a bego a ka se kgone go fenngwa ke banna ba. Gomme ge ba Mmolaile mo Khalibari, O be a le, Soulo e theogetše ka heleng, gomme O phetlile dikgonyo tša hele tlase kua, gomme a kgonyolla lefelo gomme a thopa. O hutše dikgoro tša hele. Mosong wa Paseka, O hutše dikgoro tša lebitla. O bile le dikgonyo tša bobedi lehu, hele, le lebitla; gomme o tsogile, a fentše.

⁵³ Gomme rena ba re hwilego ka go Kriste re Peu ya Abraham, gomme re feta le bafenyi ka Yena Yo a re fenyeditšego se sengwe le se sengwe. Ga go lebaka go rena go swanela go fenywa e ka ba eng gobane e šetše e fentšwe, lenaba la mafelelo, bolwetši, lehu, moleko, dilo tšohle di beilwe ka tlase ga dinao tša Gagwe. Gomme re Peu ya Abraham, go hweng ka go Kriste re Peu ya Abraham, re matšetša pele go ya go phenyo, go ya go phenyo, go ya go phenyo, re swere tshepišo ya Modimo ntle pele ga rena gomme re ya pele, Peu ya Abraham ka tshepišo ye e ennwego ke Jehofa Modimo, gore e tla hula kgoro ya lenaba le lengwe le le lengwe.

⁵⁴ Bjale lehu ga le na kgoro bakeng sa rena.

“Lehu ga le nayo, Ngwanešu Branham?”

Aowa, ga le nayo.

“Go reng ka seo? O nagana o tla hwa?”

⁵⁵ Nka se tsoge ka hwa, nka se kgone go hwa, ke šetše ke hwile, bophelo bja ka, ke bolokilwe, gomme bophelo bja ka bo fihlilwe ka go Modimo ka Kriste, bo tswaleletšwe ke Moya wo Mokgethwa, diabololo a ka se kgone go nkhwetša ge a swanetše.

“Wa lehlogonolo le yo mokgethwa ke yo a nago le kabelo ka tsogong ya pele lehu la bobedi ga le ne maatla go yena.” Re fentše gobane Kriste o re fenyeditše lona.

⁵⁶ Ge A ile godimo Khalibari go be go le mare a lekeletše ka sefahlegong sa Gagwe, megokgo le madi di hlakane mmogo le mare a dikwero, seaparo sela sa kgale sa go koloba sa Madi godimo ga mokokotlo wa Gagwe, ba Mo itia go kgabaganya maoto ge A namela thaba. Lehu le thoma go bobola go Mo dikologa, lehu le rile, “Ke tla go go tšea!”

⁵⁷ Oo, lebola lela la lehu, o le šetša ka sefahlegong sa motho. Ke ba swere ka matsogong a ka le go ba bona ba roromela le go otlogola, morago ba roromela le go otlogola, le go lla le go goelela bakeng sa kgaogelo; ga go selo boka lebola la lehu.

⁵⁸ Eupša le a tseba, ge nosi ya lehu e thoma go bobola go Mo dikologa. . . Le a tseba, ge nosi, khunkhwane ye e nago le lebola, ge e ka tsoge ya tsetsemetša go teba go lekanela, e gogela lebola la yona ntle, ga e sa na lebola ka morago ga fao.

⁵⁹ Gomme ge lehu le kgwapareditše lebola la lona ka go Morwa motswalwa ke kgarebe wa Modimo, O gogile lebola go tšwa lehung, ga le sa na lebola ka go lona. Selo se nnoši se lego, ke phoro. Nosi ye e se nago lebola e ka bobola, eupša e ka se kgone go tsetsemetša. E lekilwe, Mokgethwa Paulo o rile, ge nosi e thoma go bobola go mo dikologa, o rile, “O lehu, lebola la gago le kae? Lebitla, phenyo ya gago e kae? A go lebogwe Modimo, Yo a re fago phenyo ka Morena wa rena Jesu Kriste.” Peu ya therešo ya Bogoši ya Abraham, re hula kgoro ya lenaba le lengwe le le lengwe. Amene.

⁶⁰ Re boifa eng? Hulang dikgoro, re na le tshepišo ya Modimo, re na le Lentšu la Gagwe, re na le Moya wo Mokgethwa wa Gagwe, Barongwa ba dikaneditše go dikologa, se sengwe le se sengwe se lenaneong. Leboto le lengwe le le lengwe le ka kgona go phušulwa, le šetše le phušutšwe. Morwa wa Modimo o ya pele ga rena, difolaga tša Gagwe di a phaphasela, gomme ga go selo se ka kgonago go ema ka tseleng ya mokgethwa a eya go kopana le tshepišo ya Modimo, lehu le ka se kgone go e emiša, lebitla le ka se kgone go e emiša, diabololo a ka se kgone go e emiša. Re feta le bafenyi.

⁶¹ Bolwetši bo fentšwe bakeng sa lena, bagwera, lehu le fentšwe bakeng sa lena. Mosedumele, a o ka se Mo amogele? Mekgwa e fentšwe bakeng sa gago, moleko o fentšwe. O re, “Ke na le pelwapelwana, ga ke kgone go e fenya.” E fentšwe, O šetše a e fentše.

⁶² Ye kgolo, Peu ya mafelelo ya Abraham, ga go sa na le go dira go fenya bjale, O re fenyeditše. Bjale rena, ka mogau wa Gagwe ka tshepišo ya Gagwe, re no dumela le go swarelela, seo ke sohle re se dirago, go šetše go fedile, bolwetši bja rena, dikarogo tša rena. “O gobaditšwe ka baka la dikarogo tša rena,

o tlapirigantšwe ka baka la bokgopo bja rena; kotlo ya khutšo ya rena godimo ga Gagwe, ka megogoma ya Gagwe re fodišitšwe.”

⁶³ Peu ye kgolo ya Bogoši ya Abraham, Moya wa Gagwe o fa bošegong bjo, ditshepišo tša Gagwe tšohle ke therešo, O phethagatša se sengwe le se sengwe seo A se boletšego. Gobaneng go le gore seemo tsoko se tla fodišwa gomme se sengwe se tla šitwa? Feela ka gobane o leka go boloka nthatana ye nnyane ya lefase go go dikologa. Tlemolla se sengwe le se sengwe, eba bonolo, gomme o lebelele go Modimo gomme o e dumele ka pelo ya gago yohle, swarelela go yona, gomme e swanetše go tla go phethega. Modimo o e tshepišitše, ga go selo se ka kgonago go e thibela. A le dumela seo? A re inamišeng dihlogo tša rena gona feela nakwana.

⁶⁴ Ke ba bakae ba ka ratago go gopolwa ka thapelong ye? Phagamišang diatla tša lena, gomme le re, “Modimo, mphe tumelo. Oo, ke lewa ke hlong ka nnamong bjalo ka ngwana wa Abraham, Peu. Mphe tumelo, Morena, tloša dipelaelo tšohle, ntshwarele gosedumele ga ka.” Phagamišang diatla tša lena, gomme le re, “Modimo, nkgagele.” Modimo a le šegofatše. Morena a le šegofatše.

⁶⁵ Tate wa Legodimong, tlotšo ya Moya wo Mokgethwa e bonala e no ntlabola. Go bonagala gore O nyaka go dira se sengwe se segolo mo bošegong bjo, a nke se direge, Morena, O Morena, a nke se direge. Batho ba ba boditšwe gore ke bona Peu ya Abraham, gomme ke bajabohwa le Abraham go ya ka tshepišo. Modimo o enne gore Peu ya Abraham e tla hula kgoro ya lenaba le lengwe le le lengwe.

⁶⁶ Morena, ge go na le yo motee mo bošegong bjo yo O kokotilego mojakong wa pelo ya bona, gomme ga se ba be ba Go amogela le bjale, ba dire ba tsebe gore O nyaka go ba bea ka lapeng la Abraham. Gomme ba re, “Gabotse, ke a nwa, ke a kgoga, ke a kempola, goba—goba ke a aketša, ke a utswa,” goba se sengwe, a nke ba tsebe gore dilo tšela tšohle di fentšwe ka Kriste Jesu.

⁶⁷ Go na le ba bantši mo, ntle le pelaelo, Morena, ka dikgakanegokgolo le dipelaelo le matshwenyego, ba šitilwe go amogela Moya wo Mokgethwa, a nke ba tsebe gore O lekilwe ka mokgwa ohle boka re le, efela ntle le sebe. O tšere lefelo la rena, gomme o fentše lenaba ka bophelo bja Gago bja toko, gore rena ba re sa lokago re sa ntše re sa kgona go ba le phenyo, bjalo ka ge re dumela go Wena le go tleleima tshepišo.

⁶⁸ A nke bao ba babjago, bao dingaka tša go botega di šomilego go kgabola le go leka bokaonekaone bja bona go phološa bophelo bja bona, eupša ba robetše ba ehwa, ba bantši ba bona ka ditlaišego tše di sego tša utollwa go motho le bjale se ba ka se dirago, O Morena Modimo, ke bona Peu ya Abraham, a nke ba bone bošegong bjo ka molaetša gore Modimo o enetše Abraham

gore Peu ya gagwe e tla hula kgoro ya lenaba le lengwe le le lengwe. Gona go beng ka go Kriste Jesu Morena wa rena, go re dira Peu ya Abraham, lenaba le lengwe le le lengwe le swanetše go tlemolla.

⁶⁹ Madi a Jesu Kriste, a nke a hlwekiše sehlopha se sa batho bošegong bjo. A nke dipelaelo tšohle le dikgakanegokgolo le dipoifo di tlošwe. Gomme a nke go be le go tla pele ga Moya wo Mokgethwa. O Morena Modimo, romela Morongwa wa Gago bošegong bjo, Morongwa yola yo mogolo, Moya wo Mokgethwa, yo a tlilego fase ka sebopego sa motho feela pele ga tshenyo ya Sodoma ge Morwa yo bohlokwa wa Gago Mong a rile “Bjalo ka ge go bile ka matšatšing a Sodoma, go tla ba bjalo ka go tlang ga Morwa wa motho.”

⁷⁰ Yena Yo Abraham a mo rapetšego gomme a mmitša Morena Modimo, Elohim, a tseba gore Modimo o be a dula ka nameng yela ya Monna yola yo a jago seripa sa nama ya namane le go nwa maswi le go ja borotho, O Morena Modimo, a nke Moya wo Mokgethwa wola o bego o le ka go Yena yola letšatši lela o no dikologa yo mongwe le yo mongwe ka fa gomme o ba fe tumelo yeo Abraham a bilego le yona. A nke A bolele le dipelo tša bona bošegong bjo. A nke A bolele ka rena le ka rena gore re tla tseba gore Kereke Mokgethiwa e e amogetše.

⁷¹ Gomme Modimo, re rapelela lefase la sebe. Bofofu bjohle bja batho bao ba fufaditšwego ke thero ya Ebangedi, re a rapela, Morena, gore ka pela O tla ba biletša ntle ka pela pele tshenyego ye kgolo e etla. Re ikwela gore Kereke, bošegong bjo, e bileditšwe ntle, gomme e bolokegile, e kgwapareditše ka go Kriste, gomme e komana go ya ka go Tthatlogo, kafao re a rapela, Tate, gore O tla ba bitša go tšwa go mesepelo yohle ya go fapana ya bophelo le go ba dira ba tsebe gore ke Wena ka go ba fa taletšo go tla. E fe, Morena. Ka gore re a e kgopela, ka Leina la Jesu. Amene.

Ke a Mo rata, ke a Mo rata
Gobane O nthatile pele
Gomme a lefela phološo ya ka
Godimo ga mohlare wa Khalibari.

⁷² Bjale, Dipeu tša Abraham, molaetša o fedile, a re tseneng ka go boikutlo bja thapelo bjale, gore Moya wa Modimo o kgone go sepela go re kgabola bjale. A re e opeleng ka mahlo a rena a tswaletšwe.

Ke a Mo rata, ke a Mo rata
Gobane O nthata pele
Gomme a lefela phološo ya ka
Godimo ga mohlare wa Khalibari.

⁷³ Oo, Moya wo Mokgethwa wo mogolo o tsena ka gare ka bonanana bjalo ka marothi a phoka go tšwa Legodimong, bjalo ka Rosa ya Sarena, e tloditšwe. Arone, ge a ile ka Sekgethwakgethweng, o be a tloditšwe ka monko wa go nkgaa

bose, o tsene ka gare ka ditlhwatlhwadi di rethetha, di be di le magareng ga dipele di bapala, “Mokgethwa, mokgethwa, mokgethwa, go Morena.”

⁷⁴ A re tseneng ka Sekgethwakgethweng bjale. A nke Peu ye nngwe le ye nngwe ya Abraham fa bošegong bjo, go kgwele ye ya legodimo, a nke yo mongwe le yo mongwe yo a dumelago gore o amogetše Moya wo Mokgethwa, lena bohle Peu ya Abraham, a sepele bjale a tloditšwe ka bobose bja tumelo, a sepelele ka Sekgethwakgethweng a opela, “Mokgethwa, mokgethwa, mokgethwa, go Morena.” Ge o ne tlhoko, a nke e tsebje go Modimo feela pele re bitša mothalo wa thapelo.

Ke a Mo rata, . . .

Tsena ka gare bjale.

. . . Ke a Mo rata

Gobane O nthatile pele

Gomme a lefela phološo ya ka

Godimo ga mohlare wa Khalibari.

⁷⁵ Bjale, le se nagane ka se e lego phošo ka lena, e nong go nagana ka Yena ge re e opela gape, nagana ka, “A ke a Mo rata? A lerato la ka—la ka le lekanetše go Yena? A ke Mo ratile, ke Mmeile pele? Ge ke tsoga mosong, a ke a dira, selo sa pele ke a Mo tumiša? Gohle go kgabola letšatši ke a Mo tumiša? Ka diphethong tša ka a ke a ipotšiša nnamong, ‘A ke thato ya Gago, Morena?’ A ka kgonthe ke Mmea pele ka go se sengwe le se sengwe? A O tla pele?” Ge A dira, a re nong go e opela gape gomme re naganeng ka yona.

Ke a Mo rata, (Pele.) Ke a Mo rata

Gobane O nthatile *pele*

Gomme a lefela phološo ya ka

Godimo ga mohlare wa Khalibari.

⁷⁶ O ikwela bobose bjola bja Moya bo no sepela godimo ga batheeletši? Bjale, ka potego, pele ga Modimo, ke ba bakae ka kgonthe ba kgonago go ikwela gore Moya wo Mokgethwa o kgauswi, re dutše ka mafelong a Magodimong ka go Kriste Jesu?

⁷⁷ Sepela Moya wo mobose wa Modimo, bitša go tloga lehung go ya Bophelong. Bolela le Peu ya Abraham, ba fe tumelo, a nke ba tsebe gore ba ka hula kgoro ya lenaba le lengwe le le lengwe, gobane lenaba le lengwe le le lengwe le beilwe ka tlase ga dinao tša Kriste, ebile le lehu, gomme re ema ka go Yena mofenyi.

⁷⁸ Lenaba le lengwe le le lengwe le ka tlase ga maoto a gago ge feela o le ka go Kriste, gobane se sengwe le se sengwe se ka tlase ga maoto a Gagwe. Re tsena bjang ka go Yena? “Ka Moya o tee bohle re kolobeletšwa ka Mmeleng o tee,” re dirilwe batšeakarolo ba tšhegofatšo ya go swana, maatla a go swana. Tumelo ya go swana e dula ka gare ga pelo ya rena yeo e dutšego ka go Abraham, tumelo yela ya go swana yeo e bego e le ka go

Abraham, e swere tshepišo ya Modimo feela pele ga tshenyo ya lefase, lefase la Sodoma, ka letšatšing la Loto, tumelo yela ya go swana e ka gogela Morongwa yola wa go swana go wo wa go swana... go moago wo, le go dira dilo tša go swana tšeo A di dirilego nako yela. A le a e dumela? Ke ba bakae ba dumelago ntle fao?

⁷⁹ Ke batho ba bakae ba babjago ba lego ntle ka go batheeletši fale, ba nogo go babja? Phagamišetšang diatla tša lena godimo, goba go hloka Modimo bakeng sa se sengwe, phagamišetša diatla tša gago godimo. Ga ke kgathale moo o lego, e no phagamišetša diatla tša gago godimo. Ba bantši kudu go ka ba biletša sefaleng. Ge o ka dumela ka pelo ya gago yohle gore Morongwa wa Modimo yo a tlilego go etela Abraham o mo... Dumela go Yena ka pelo ya gago yohle.

⁸⁰ A Jesu ga se a...? Morongwa yola wa go swana, Moya wola wa go swana o be o le ka go Monna yola a boletšego le Abraham, a O be a se a bonagatšwa mo ka mmeleng wa nama go tloša sebe? Mosadi o kgwathile kobo ya Gagwe letšatši le lengwe, gomme O rile, “Ke mang a Nkgwathilego?” Gomme a Mangwalo a rena ga se a re botša gore Yena ke Moprsta yo Mogolo gonabjale, yoo a kgonago go kgwathwa ke maikutlo a mabofokodi a rena?

⁸¹ Sebakeng sa go biletša mothalo wa thapelo godimo fa feela sehlopha ka dikarata tša thapelo, ke nyaka moago ka moka, yo mongwe le yo mongwe wa lena ntle fale, gore le ke le tsebe ga la swanela go ba le karata ya thapelo godimo fa, ke—ke bolela se Leineng la Morena Jesu, le ka Bogoneng bja Morongwa wa Modimo, Yo ke lego mohlanka wa gagwe: Wena kgopela Modimo se o se hlokago gonabjale, gomme o tleleime tshepišo, gomme o bone ge eba Moprsta yo Mogolo a ka se bolele feela bjalo ka ge A dirile ge A be a le mo lefaseng.

⁸² A le a dumela A ka kgona go dira seo? A e tla tsikinya soulo ya gago ge A ka dira, a o tla... go go dira o Mo rapele? Lena batho bohle ntle fale bao le babjago goba go tlaišwa goba go hloka e ka ba eng, a o ka, a go tla go tsikinya go bona Modimo a dira seo, go e tshepiša, morago ga ge ke e rerile bošegong bjo? Gomme Modimo o dirile tshepišo gore go tla ba bjalo feela pele ga go tla ga Morwa wa Modimo. Ga se ya ke ya ba ge e sa le go tloga nako yeo. Puruputšang dihistori, ga se ya ke ya ba ge e sa le go tloga nako yeo, eupša ke yona bjale. E ile kae? Go Peu ya Abraham, bao ba tladišwego ka Moya wo Mokgethwa.

⁸³ A go na le batho e ka ba bafe ba babjago ka lehlakoreng le? Phagamišetša seatla sa gago godimo, godimo mo, godimo ka lehlakoreng le, phagamišetša diatla tša gago godimo.

A re rapeleng.

⁸⁴ Morena Modimo, a nke yo mongwe a be le tumelo. E fe, Morena, gore batho ba ke ba tsebe gore O Modimo wa go swana, O Yena wa go swana Yo a tlilego go Abraham ka mohuta tsoko wa

mmele wa nama, gomme O boletše le yena, gomme O mmoditše o be a le mang, goba o boletše leina la gagwe, le go mmodiša ka Sarah, le go botšiša moo a bego a le gona, le go dira leswao lela. O tshepišitše e tla direga gape, gomme e diregile, re a leboga. A nke batho ka go batheeletši ba ba be hlatse bošegong bjo gore ka Letšatši leo go ka se be le dipotšišo nako yeo. E fe, Morena.

⁸⁵ Ge modiradibe a le gona, a nke le yena a kwe maatla a Bogona bja Moya gore a ke a kitimele aletareng ka pela gomme a neele bophelo bja monna, goba bophelo bja mosadi. Ka Leina la Jesu, ke a rapela. Amene.

⁸⁶ Bjale e nong go ba le tlhomphokgolo ka mo le kgonago, gomme motho yo mongwe le yo mongwe a rapele. E ka ba kae go kgabola moago, morago, pele, mogohle o lego, nno rapela.

⁸⁷ Oo, a nako! Ga le tsebe ka fao ke ikwago gonabjale. Kgoro ya selo se ke ya ka bjale. Modimo o bula dikgoro, dikgoro go ditlaišego tša gago, dikgoro go tlhatho ya dikgopolo tša gago tša pelo ya gago. Beibele e tshepišitše gore Moya wo Mokgethwa ebile o be o le Mohlathi wa dikgopolo tša monagano. Yeo ke kgoro ye e tshepišitšwego, yeo ke kgoro ye Modimo a e fago gomme a e bulago.

⁸⁸ Godimodimo ka khoneng, ka tsela ye, yo mongwe le yo mongwe lebelela ka tsela ye nakwana feela, godimodimo ka khoneng monna šo le mosadi ba dutše fale, ke mogatša le mogatšagadi. Seetša sesele se lekeletše godimo ga bona. Mosadi o ntebeletše, o tlaišega ka se sengwe sa phošo ka leoto la gagwe; monna o na le bothata bja mogodu. A o a dumela gore Modimo o tla go fodiša? Phagamišetša seatla sa gago godimo ge o ka e dumela. Go lokile, bobedi bja lena eyang gae gomme le fole, Jesu Kriste o le dira le fole.

⁸⁹ Eng? Hula kgoro ya lenaba. Phenyo šeo. “Ge o ka kgona go dumela!” Rapela.

⁹⁰ Go reng ka ntle ka mo? Go na le mosadi yo monnyane o dutše kua o a rapela. Lebelela ka tsela ye, kgaetšedi. O dutše ka thoko ga monna wa go akola. Wena. Atheraithisi, bolwetši bja swikiri, o be o rapela Modimo go go fodiša. Ge seo e le nnete, phagamiša seatla sa gago. Go lokile, eya gae gomme o amogele phodišo ya gago.

⁹¹ Dumela bjale. Yo mongwe thwi tlase fa o phagamišitše seatla sa bona, go bapa le mothalo wo fa felotsoko. Wena? O dumela ka pelo ya gago yohle, wena, le mogatšago, bana ba gago ba bannyane? O a dumela Jesu Kriste o nthometše fa bakeng sa morero wo? O a dumela Kriste a ka nkutollela seo bothata bja gago e lego? O na le bothata bja mogodu; mogatšago o na le se sengwe sa phošo ka mahlo a gagwe. Yeo ke nnete. Beanang diatla tša lena godimo ga lena seng, ka gore Jesu Kriste o le fodišitše bobedi gonabjale, O RIALO MORENA.

92 Ke a le hlohla go dumela! A le a dumela? A nke le tsebe gore Ke Morongwa wa go swana, ke tla retolla mokokotlo wa ka.

93 Thwi go otloga ka morago ga ka go monna, o rapediša mme le tate, bothata bja pelo le atheraithisi. Ba tšwa Arkansas, leina la bona ke Smith. Dumela ka pelo ya gago yohle morago fao, Mna. le Mdi. Smith. Eyang gae gomme le amogele phodišo ya lena gomme le dirwe go fola, Leineng la Jesu Kriste. Amene. Ge o e dumela ka pelo ya gago yohle, gona sepela gomme o e amogele.

94 Bjale, e nong go tšwelapele le rapela, yo mongwe ka lehlakoreng le.

95 Go na le mosadi o dutše ka lehlakoreng le, gomme o na le bothata ka mokokotlo wa gagwe le letheka la gagwe—la gagwe, Mdi. Kirby. Dumela ka pelo ya gago yohle? A o a dira? Gona o ka kgona go ya gae, gomme wa fola, Mdi. Kirby. Jesu Kriste o go dira o fole.

96 A le a dumela? Morongwa wa go swana wa Modimo! Peu ya Abraham, bothata ke eng?

97 Go na le mosadi thwi ntle go tloga go mohumagadi yola fale, o ntebeletše, o rapediša yo mongwe, ke morwa wa gagwe, o ka sepetlele sa monagano gomme o a mo rapediša. Yeo ke nnete, mohumagadi. O a dumela Jesu Kriste o tla mo dira a fole? Ge o dira, phagamišetša seatla sa gago godimo. Go lokile, a nke go be bjalo, bjalo ka ge o dumetše.

Eba le tumelo go Modimo.

98 O nagana eng, hani? Mosetsana yo monnyane yola, mama ka matsogo a gagwe go go dikologa fale, o a dumela? O a dumela Jesu o tla go fodiša ka bolwetši bjoo bja swikiri gomme a go dira o fole? O a dira? Ge o dira, emelela ka maoto a gago. Go lokile, eya gae gomme o fole. Leineng la Jesu Kriste, e dire bjalo.

99 Mohumagadi yo monnyane a dutšego fale a e lebeletše a hlalala, a lebanego le karo Mošupologo mosong go tšwa go bothata bja sesadi. O a dumela Modimo o tla go dira o fole gomme o tla go tliša go kgabola? Ge o dira, sepela gomme o e dumele, Leineng la Jesu Kriste.

100 Go reng ka wena ka setulong sa bagolofadi? Atheraithisi. Ge o e dumela, o ka kgona go ya gae le go fola, le wena, Leineng la Jesu Kriste.

101 Šole o tšwa go setulo sa bagolofadi. O dumela ka pelo ya gago yohle? O ka ba le se o se kgopetšego. Šole o a ya, a golofetše, go tšwa setulong sa bagolofadi, o a sepela Leineng la Morena.

102 A re emeng ka maoto a rena, yo mongwe le yo mongwe, yo mongwe le yo mongwe yoo a babjago le go tlaišwa, emelela ka maoto a gago bjale, efa tumišo go Modimo. Phagamišetšang diatla tša lena godimo gomme le tumišeng Morena, yo mongwe le yo mongwe, bakeng sa botho bja Gagwe, yo mongwe le yo mongwe, bakeng sa botho bja Gagwe. Etla go Morena.

103 Modiradibe yo mongwe le yo mongwe, etla mo, Leineng la Jesu Kriste, modiradibe yo mongwe le yo mongwe sepela ka tsela ye. Etla, modiradibe yo mongwe le yo mongwe, ka pela sepela ka tsela ye, gomme o sokologe dibeng tša gago. Ke a go laela, Leineng la Jesu Kriste, ka sefahlegong sa Morongwa yo Yo a dirago segole go sepela, a hlathago dikgopolo tša pelo, Morongwa wa Modimo: Etla pele, modiradibe, ka go boifa Modimo gomme o sokologe dibeng tša gago.

104 Seo se kgwahlile, gomme se thata, eupša ke O RIALO MORENA. Ge o ka tla, o tla phološwa, feela bjalo ka ge mosadi yo a fodišitšwe gomme ba bangwe ba fodišitšwe. Etla pele, modiradibe.

105 Etlang thwi godimo ka tsela ye, batho. Yo mongwe le yo mongwe a nyakago Moya wo Mokgethwa, etla ka tsela ye. Ge o nyaka go amogela Moya wo Mokgethwa, etla ka tsela ye, ye ke iri! Sodoma e ya go swa morago ga lebakana. Etlang pele, lena ba le nyakago Moya wo Mokgethwa gomme le nyaka se sengwe go tšwa go Modimo, sepelelang pele, ye ke iri ya tlhakodišo.

106 Ge o nyaka go hlakodiša soulo ya gago go tloga molekong, go hlakodiša soulo ya gago go tloga sebeng, go hlakodiša soulo ya gago go tšwa go poifo, go hlakodiša soulo ya gago go tšwa sebeng, Leineng la Jesu Kriste Morwa wa Modimo, yo Bogona bja Gagwe bo lego gona bjale, ke a le laela ka Modimo yo a phelago Yo a tla le ahlolago mo go Tleng ga Morena Jesu, etla pele gomme o amogele Jesu Kriste.

107 Etla, se ke sebaka sa gago. O hlohlwa ke Moya wo Mokgethwa, O tla go ahlola ka Letšatši la Kahlolo. Etla ka go boifa Modimo, etla gobane Modimo o fa, etla gobane Modimo o a bitša. O se tle ka kanegelo tsoko ya go šokiša, o se tle ka selo, eupša ka gobane Modimo o go laleditše go tla, etla bjale, ye ke yona.

108 Leineng la Kriste, ke e bolela gape: A nke modiradibe yo mongwe le yo mongwe, motho yo mongwe le yo mongwe yoo a gateletšwego, motho yo mongwe le yo mongwe yoo a nago sebe bophelong bja bona, gosedumele, gomme ga se wa amogela Moya wo Mokgethwa, e ka ba eng yeo o e hlokago ka mothalong wa ditsela tša semoya, etla pele bjale. Ge o na le pelwapelwana o sa kgone go e fenya, ge o lekwa ka motšoko, ge o lekwa ka sebe etla pele gomme o hlakodišwe, Leineng la Jesu Kriste.

109 Lebelelang mokgekolo yo wa go šokiša, ga ke tsebe se e lego phošo ka yena, ga ke tsebe se Moya wo Mokgethwa o se boletšego, eupša šole o dutše a tlemilwe ka go setulo sa bagolofadi metsotso e se mekae ya go feta, šole o sa le godimo ga maoto a gagwe a efa letago go Modimo.

Bašomi, etlang le bona, etlang pele.

¹¹⁰ Oo, Peu ya Abraham, phafogang, rapelang, ebang komana, go Tla ga Morena go batametše! Etla pele, etla pele, tšwelapele o etla.

¹¹¹ A nakwana! A nakwana, Moya wo Mokgethwa o no tlotša gohle go dikologa fa. Ke lebeletše ntle godimo ga batheeletši ba, se sengwe tlase ka go nna se no bonala se mphagamišetša godimo, godimo, godimo, godimo. Sengwe se mo, maatla a Modimo a mo, letago la bakgethwa le mo, maatla a Modimo a magareng ga batho. Peu ya Abraham, o na le, kgoro ye nngwe le ye nngwe ke ya gago, kgoro ye nngwe le ye nngwe ke ya gago. A re phagamišeng diatla tša rena mogohle, lena bohle badiradibe ba go itshola. Phagamišang diatla tša lena, yo mongwe le yo mongwe.

¹¹² O Morena, Mohlodi wa Magodimo le lefase, romela Molaetša wa Gago le maatla a Gago godimo ga batho ba. A nke Moya wo Mokgethwa o tšee tokelo ya tsela ka dipelong tša bona gonabjale. Ba tlatše ka botho bja Gago, ba tlatše ka maatla a Modimo, le balela dibe tša bona, fodiša bolwetši bjo bongwe le bjo bongwe ka moagong, ikhweletše letago Wenamong. E fe, Morena, ge bakgethwa ba sa Go rapela. E fe, Tate, Leineng la Jesu Kriste.

¹¹³ Ge bakgethwa ba tumiša Modimo, a re kopaneng le batho ba mo aletareng, re ye thwi go dikologa khona kua. Ngwanešu Curly, yo mongwe fale, go ba etapele... Thwi ka tsela ye bjale gore re kgone go rapela le wena thwi ka kamoreng, thwi ka tsela ye. Yo mongwe le yo mongwe mo bjale, sepelelang feela ka tsela ye. [Ga go selo go theipi—Mor.] Bašomi eyang thwi le bona, gonabjale, go fihla re eya kamoreng. Gonabjale. Ka moka ga lena, e ka ba mang fa yoo a ka ratago go tšoenana le sehlopha se?

¹¹⁴ Mo matšheng wa Khalibari. Halleluya! Mo matšheng wa Khalibari. Phenyio ka go Jesu, phenyio ya Jesu Kriste. Ba tla hula kgoro ya lenaba, ke tshepiša seo. Modimo a ka se bitše e ka ba mang, ntle le ge e be e le Peu ya Abraham. Šebale ba ya Khalibari, fale ba ya go hula dikgoro tša lenaba le lengwe le le lengwe. Modimo a šegofatše dipelo tša bona ge ba eya, thapelo ya ka.

¹¹⁵ Etlang thwi pele, dikgaetšedi, ge o le tseleng ya gago thwi le bona, eya pele thwi. Mang kapa mang yo a nyakago go ya thwi ka gare bjale, yo a šitilwego go ya lefelong la pele, etla thwi pele, kgoro e sa bulegile.

¹¹⁶ Gomme fale moo o ka kgonago go hula kgoro ya lenaba le lengwe le le lengwe o nago nalo, lenaba le le go kgamago, lenaba le le go dirago gore o dire dilo tše o sa nyakego go di dira, lenaba le le beago pelaelo le poifo ka pelong ya gago, thwi fale ke lefelo go le fenya; le šetše le fentšwe, e no ya o e tleleime. Ba tseleng ya bona go ya Khalibari.

Ke a Mo rata, ke...

A re phagamišeng diatla tša rena bjale ge re opela.

...Yena

Gobane O nthatile pele
 Gomme a lefela phološo ya ka
 Godimo ga mohlare wa Khalibari.

¹¹⁷ A re nong go šišinya diatla tša rena ka mokgwa *wo* gomme
 re tswalele mahlo a rena.

Ke a Mo rata, (E nong go lebelela seo, baena.)
 Ke . . .

Bohle ba ba Mo ratago, šišinyang go Yena.

Gobane O nthatile pele
 Gomme a lefela phološo ya ka
 Godimo ga wa Khalibari . . .

Go lokile, Ngwanešu . . . ? . . . 

59-1121 Peu Ya Gago E Tla
Hula Kgoro Ya Lenaba La Gagwe
Santa Clara County Fairgrounds
San Jose, California U.S.A.

NORTH SOTHO

©2026 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Tsebišo ka tokelo-kgatišo

Ditokelo ka moka di bolokilwe. Puku ye e ka ngwalollwa godimo ga sengwalolli sa ka gae go šomišwa ke mong goba go fiwa ntle, mahala ntle le tefo, bjalo ka sedirišwa go gaša Ebangedi ya Jesu Kriste. Puku ye e ka se kgone go rekišwa, go tšweletšwa gape ka bopepetla, go romelwa go website, go bolokwa go sedirišwa sa go bušetša, go hlathollelwa malemeng a mangwe, goba go šomišetšwa go kgopela ditšhelete ntle le tumelelo ya go ngwalwa ya Voice Of God Recordings®.

Tshedimošo ye e Tseneletšeng goba materiale yo mongwe o leng gona, ka kgopelo ikopanye le:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

www.branham.org